

Alþingi  
Erindi nr. P 130/729  
komudagur 12.1.2004



## LANDSSAMBAND LÖGREGLUMANNA

Nefndasvið Alþingis  
Austurstræti 8-10  
150 Reykjavík

Reykjavík, 8. janúar 2004

### Efni: Umsögn um frumvarp til laga um réttindi og skyldur starfsmanna ríkisins

#### Almennar athugasemdir

Með bréfi dags. 27. nóvember sendi Efnahags-og viðskiptanefnd Alþingis Landssambandi lögreglumanna frumvarp um réttindi og skyldur starfsmanna ríkisins.

Landssamband lögreglumanna þakkar nefndinni fyrir að fá tækifæri til að koma athugasemdum sínum að.

Það er ljóst að efni frumvarpsins varðar lögreglumenn mjög miklu og verður hér á eftir getið helstu athugasemda Landssambands lögreglumanna.

#### Lögreglumenn/embættismenn

Lögreglumenn falla undir það að vera embættismenn í skilningi laga um réttindi og skyldur starfsmanna ríkisins sbr. 7.tl. 1. mgr. 22. gr. laganna en embættismenn hafa lengi notið meiri verndar í starfi en aðrir starfsmenn.

#### Áminning og andmælaréttur felldur brott

Með frumvarpinu er grundvallarréttindum lögreglumanna vikið til hliðar. Það sem að áður gat skv. 2. mgr. 26. gr. starfsmannalaga hugsanlega réttlætt áminningu lögreglumanns mun leiða til þess að lögreglumanni sé án nokkurs fyrirvara veitt lausn um stundarsakir á hálfum launum um ótiltekinn tíma og felldur brott réttur hans til þess að fá áður áminningu og andmælarétt fyrir áminningunni.

Þess er svo alls óvist hvort að hann eigi afturkvæmt til starfa sinna að nýju. Þar yrðu lögreglumenn að reiða sig á nefnd sérfróðra manna um stjórnslu skv. 27. gr. (þrátt fyrir að frumvarpið geri ráð fyrir því að stjórnslulög gildi ekki lengur um uppsagnir) sem að skoðar mál viðkomandi lögreglumanns og myndi hún illa geta gengið gegn því orðalagi laganna sem kveður á um að rétt sé að veita lögreglumönnum lausn eigi einhver þau

# LANDSSAMBAND LÖGREGLUMANNA

---

atriði sem að 2. mgr. 26. gr. nefnir við. Þannig er það sem áður var forsenda áminningar með breytingunni orðin lausn lögreglumanns frá störfum.

Þarna er augljóslega um að ræða mjög alvarlega aðför að starfsöryggi lögreglumanna enda störf þeirra oft unnin við mjög erfiðar aðstæður og sífelld ófyrirséð verkefni sem að bregðast þarf við og er þ.a.l. skjótrar ákvarðanatöku oft þörf. Vegna þessa er brýnt að lögreglumenn hafi fulla möguleika að koma sjónarmiðum sínum á framfæri áður en þeim er vikið frá um stundarsakir en verði frumvarpið samþykkt njóta þeir ekki þess réttar.

## Jafnræði gagnvart öðrum ríkisstarfsmönnum

Frumvarpið felur í sér eins og áður er getið gagnvart lögreglumönnum, að felld er brott 2. másl. 4. mgr. 26. gr. laganna um áminningu vegna atvika sem að getið er um í 2. mgr. 26. gr. laganna eins og áður er getið. Þannig á ríkislögreglustjóri að leysa lögreglumann frá störfum eigi einhver þau atriði við sem að getið er um í 2. mgr 26. gr.

Landssamband lögreglumanna telur þarna um mikinn ágalla í frumvarpinu að ræða enda í frumvarpinu verið að fella brott 21. gr. starfsmannalaga þannig að ekki er lengur þörf forstöðumanna að áminna almenna starfsmenn vegna sams konar ávirðinga og rétt er að leysa lögreglumenn frá störfum vegna. Þessi grein var áður vegvísir fyrir forstöðumenn hvenær þeim bæri að veita áminningu en nú er þessi grein felld brott. Vaknar þá sú spurning hver sé tilgangurinn með að fella þennan vegvísi brott gagnvart öllum starfsmönnum ríkisins nema gagnvart lögreglumönnum og öðrum embættismönnum sbr. 2. mgr. 26. gr. laganna. Ekki verður séð hvaða ástæður það eru þá sem að réttlæta uppsögn ríkisstarfsmanna.

Vegna þessa á ríkislögreglustjóri skv. lögum að veita lögreglumönnum lausn um stundarsakir komi til einhver þau atriði sem að í greininni eru nefnd. Aftur á móti virðast vera önnur sjónarmið varðandi aðra starfsmenn lögregluembætta eða aðra starfsmenn ríkisins vegna sams konar atvika enda eru þessi tilvik felld brott úr lögum gagnvart sumum starfsmönnum en haldið inni gagnvart öðrum! Þessar breytingar hafa því víðtækari áhrif á lögreglumenn og aðra embættismenn en aðra starfsmenn ríkisins og skapa ójafnræði.

## Lokaorð


Verði frumvarpið að lögum er það ljóst að lögreglumenn og aðrir embættismenn koma til með að búa við mikið óöryggi í starfi sbr. það sem að kemur fram hér að framan, andstætt því sem að þeim hefur verið tryggt í gegnum tíðina í ljósi séraðstæðna þeirra. Þá leiðir það til gríðarlegra breytinga, það sem að hefur getað réttlætt áminningu í dag mun leiða til lausnar frá embætti án þess að lögreglumönnum eða öðrum embættismönnum gefist nokkur möguleiki að taka sig á.

# LANDSSAMBAND LÖGREGLUMANNA

---

Þá má í ljósi framanritaðs leiða sterkar líkur að því að lögreglumenn njóti mun lakara starfsöryggis en aðrir starfsmenn ríkisins þar sem að sérstaklega tilgreind tilvik leiða til lausnar frá störfum meðan að ekki eru gerðar kröfur um það gagnvart öðrum ríkisstarfsmönnum þar sem að sambærileg tilvik hafa verið numin brott.

Virðingarfyllt



---

Grétar Jónasson hdl.,  
framkvæmdastjóri LL